

Agihan Bantuan Prihatin PKP

Oleh: Nurhazirah Hanis Faisol, 1180311

PAGOH: Sebanyak 48 buah keluarga menerima bantuan secara pandu lalu ketika Perintah Kawalan Pergerakan (PKP) menerusi Program Bakul Kasih di Sekolah Kebangsaan (SK) Paya Redan pada 19 Disember lalu.

Penyelaras program yang juga Guru Penolong Kanan Hal Ehwal Pelajar SK Paya Redan, Zamri Hisham berkata, berdasarkan data yang diperolehi seramai 10 buah keluarga dikategorikan dalam kelompok miskin tegar dengan pendapatan per kapita keluarga kurang daripada RM151 sebulan.

“Sasaran pihak sekolah adalah kepada mereka yang terkesan sama ada pengurangan gaji, kehilangan pekerjaan atau kepada golongan miskin tegar,” katanya ketika ditemu bual.



Zamri Hisham (kiri) selaku penyelaras program menguruskan pengagihan bungkusan makanan kepada penerima bantuan Program Bakul Kasih.

Menurutnya, rata-rata penduduk di sekitar ini adalah mereka yang berpendapatan rendah tambahan pula dengan pelaksanaan PKP sejak Mac lalu, kehidupan mereka ‘ibarat kais pagi makan pagi, kais petang makan petang’ sehinggakan ramai dalam kalangan mereka mengambil peluang melakukan kerja sampingan bagi menampung pendapatan keluarga.

Selain itu, ia juga merupakan program terbesar yang pernah diadakan serta mendapat sambutan daripada pelbagai pihak, malah lebih sumbangan yang diperolehi juga dapat diagihkan kepada golongan asnaf dan ibu tunggal.

Bantuan prihatin ini disampaikan oleh pihak sekolah dengan kerjasama Persatuan Ibu Bapa dan Guru. Mereka menerima bantuan barangan keperluan dapur seperti beras, minyak masak dan barang basah.



Agihan bantuan prihatin PKP dijalankan mengikut prosedur operasi standard yang telah ditetapkan.

“Program ini sangat membantu dan saya bersyukur menerima bantuan tempoh hari,” kata Alif Haiqal, 29, sebagai wakil penerima bantuan.

Anak keempat daripada tujuh beradik itu amat mengharapkan bantuan seperti ini diteruskan lagi pada masa akan datang berikutan pendapatannya yang terjejas sejak PKP dilaksanakan. Tambahan, dia juga perlu menyara kedua ibu bapanya dan seorang datuk yang tinggal bersama.

Sementara itu, ia dijalankan secara pandu lalu mengikut prosedur operasi standard ketat yang ditetapkan seperti mengamalkan penjarakan fizikal, pemakaian pelitup muka dan pemeriksaan suhu badan.

Mengulas lanjut, program seperti ini akan diadakan lagi pada masa akan datang dan dinaik taraf kepada *Food Bank* dengan harapan ia dapat meringankan beban bagi mereka yang kurang berkemampuan.